

## 09.03 PROFIL

---

### «Barschun da dents, tabletas cunter malaria e l'apparat da fotografar»

*Quai èn las trais raubas las pli impurtantas ch'il fotograf da Segl dovra durant ses viadis a l'exteriur sin ils fastizs dals nomads.*



I saja meglier da betg far memia quitads avant che partir per in viadi, uschia Gian Giovanoli. Il figl d'ina famiglia d'hoteliers a Segl, ha ristgà cun 30 onns da far il pass en l'indipendenza e da metter tut las chartas sin sia passiu: il fotografar. Sper sias lavurs ch'el expona en sia atgna galateria «L'atelier» a San Murezzan, è el era fascinà da la vita da differents pievels da pasters. Uschia ha l'um da 42 onns visità per exempel ils «Nenets» sin la peninsla Jamal en la Sibiria u er ils Mundari en il Sudan dal sid. Cun sia camera ha el documentà la cultura, cuntrada e vita da la glieud a moda impressiunanta. L'ultima visita en il Sudan ha Gian Giovanoli er filmà. Cumenzà aveva il Segliot ina carriera sumeglianta a quella da ses bab, Dumeng Giovanoli. Er el ha fatg il giarsunadi sco cuschinier e sa participà a cursas da skis sin nivel europeic. Causa problems cul dies ha il giuven da 20 onns dentant stuì chalar cun l'ir culs skis professionalmain.

*Redacziun: Anna Caprez*